

合江縣志一

蒲伯英題

重修合江縣志序

民國十八年夏

鉄夫

以四川省政府命來知合江縣事下車之始縣志交

涉員劉美唐君來謁以合江新修縣志成已付印惟尙需印費及善後各事未有屬爲請余維地方之志卽地方之史蒐羅修輯司牧者之責也如所請於原所籌定之欸督促之并函劉疇九張鼎堂陳鈺興王仁仿諸君爲結束委員以藏厥事間嘗取其稿而瀏覽之而不禁有感矣合江之爲縣自漢始地濱大江頗稱繁庶明末獻賊屠蜀波濤震撼井里爲墟其縣治子遺僅數十家則其文獻之滅亡盡淨可知也清乾隆二十七年江夏葉體仁創修之嘉慶十七年金匱秦湘續修之同治十四年武進瞿樹蔭又續修之逮民國十四年已五十四易寒暑矣適四川通志局之徵求王前知事玉璋延劉君疇九主任其事分聘採訪編輯諸君子鑽研討論其事實均斷自民國十四年其方式一遵通志局疊次所發之表式暨例言參以富順志之綱目序例及吾蜀各縣志之善本以一年而採訪竣事著

手編輯都爲十二篇冠以地圖風景名人書畫足資紀念者自新政改易治亂相嬗舊志之可因者不得其半全賴加意搜羅薈萃成書不遺不濫行且刊以公世甚盛事也嗟乎地方志乘國史取以爲資自志乘失其傳而於是體制全乖紀傳叙述之文尤無法度不惟其言不盡雅馴亦復有害於事理宋范石湖之吳郡志明康對山之武功志清陸稼書之靈壽志均膾炙人口爲後來典則紀文達公撰四庫提要亦嘗稱爲良志而章實齋先生文史通義著論駁之猶不能免無倫類之譏誠哉措紳先生難言之矣國變以來軒然大波海飛山走合江當大江之衝煙硝雨彈時有所聞劉君等於軍事倥傯之間獨垂注文獻而所費且不過二千餘金以成此巨帙惟詳惟實俾一邑之典章文化得以存而不墜其關係爲奚若耶至世運之隆污民生之消長禮教之盛衰一展卷而瞭如指掌焉是尤

夫之厚幸也夫合江縣縣長高縣余鈇夫

重修合江縣志序

纂紀一代典章文物之聲采以昭垂於不朽者史官之職也史官因山川風俗之異揆以成一代之文獻者縣志尙矣縣志固一邑之史也董志役者必胸羅萬卷旁及醫藥星象聲光氣化電諸科學而又周覽天下名山大川融冶其才學識於筆底夫然後可以縱橫千古若出自庸衆烏足稱焉共和五年政府將有事於大一統之纂述則令各行省以通志進省則縣志是徵合江遂有重修縣志之役越十五年志成而余適權縣事執掌簿書未遑商量文字適事觀成而已主任劉君天錫出屬草見示人物篇之義烈者明代二人有清太平天王之役死事者八百六十餘人共和十數年來死於匪患者遂百六十餘人矣元代襄予節烈者一人明倍之清則九百三十人而有奇盛哉而朱明以前可歌可泣之倫其以年遠失傳者殆不知凡幾亦可慨也革命而還則三人已耳風俗醇漓之昇降蓋可觀矣合江置縣昉於元鼎三年歷晉齊梁北周清唐宋元明清總十三朝

十一姓帝王乘除遞嬗疆域政教隨朝代爲變遷共和以來改建今制人口三十餘萬面積二萬餘方里綰瀘渝之中樞扼長江之上遊古稱帶礪河山之國殆無以加諸登少岷而四望東撐神臂之雄西聳丁峯之秀南矗榕山北敞金華鬱葱佳氣入眼蔚然葉體仁劉養鋒之治績猶有存焉者乎鷄鳴犬吠相聞劉望之廖昌年董新策李光祐之高風猶有存焉者乎闕大江之東下一瀉汪洋以達於海則愴然於錦繡江山之腥血也覽雲霞之舒卷則又慙然於催科之懷也余遭際喪亂思有以生聚而教訓之而事與心違惶然汗已後之宰是邦者俯仰先民之矩矱庶幾勉於導政齊刑之治乎是所馨香而禱祝者中華民國十七年二月綏陽彭起鏗

策銘

重修合江縣志序

民國十三年冬玉璋奉委權合江越明年四川謀修通志屬縣各以志上
爰稽合江縣志自清乾隆二十七年肇輯其後嘉慶十七年同治十年增
修者二迄今闕修蓋又五十四年矣縣當大江赤水之會爲蜀南衝要年
來國中繹騷蜀號稱最縣境迭蹂於兵匪又爲蜀最今春夏交百物翔貴
斗粟萬錢山陬農毗至有食及草木者余方與士紳孳矻於賑務團務蘇
饑詰暴勉附於急則治標之義乃端倪惻見亢旱繼之江介兵戈闐然復
作余亦播越邑南逾月始返催科益紛官民交憊所欲抒吾志以慰縣人
者百不一成偶披舊志景前賢之治績感今昔之理亂益不能不悵然而
太息也方志之作所以表舊地方文物嬗進之迹往者利弊未來之興革
資焉故眞西山有言爲此邦吏不可無此書朱晦翁知南康軍下車卽詢
郡志論者尤以爲知務第舊志時代殊異多所未詳今政體民俗已著變
更紀載網羅難拘成例因延疇九晉明諸君子討論損益折衷於近刊定

海江津富順各志例續入同治以還五十四年之故實歷時十月幸觀厥
成彰往開來庶其在此嗟乎厚生則安循約則治昔尼父適衛答冉有之
問曰富曰教有以哉余遭世多難力竭心遙區區所施曾無足述弁此聊
以志憾覽是書者誠究理亂之原悟自治之旨倡率互助各盡所能期無
滯文化之演進而不徒仰治於有司此邦其有孚乎中華民國十四年歲
在乙丑十一月畢節王玉璋

合江縣志目錄

舊序

輿地篇第一

治制篇第二

財賦篇第三

食貨篇第四

武備篇第五

選舉篇第六

教育篇第七

禮俗篇第八

人物篇第九

藝文篇第十

金石篇第十一

雜紀篇第十二

補遺

修志人員表

跋

舊序

清乾隆二十七年

瀘州知州護理永甯道夏詔新

雲南姚州

合江令葉君西田壬申歲奉命簡發河南卽攝篆汝甯通判及羅山正陽遂平汝陽等縣印務旋授知孟津縣事將調補祥符以兄方伯公由浙江調任河南遵例迴避遂復蒙聖恩補授合江夫合江非巨邑也雖地勢濱江而其間城郭之傾圯壇廟之頽壞道路之殘缺橋梁之坍塌與夫書院學宮之毀陋人情風俗之遷移數十年來竟無一補其缺開其新振其靡清其弊者葉君抵任後卽矢心竭力勞瘁寒暄七載之內旣爲之補缺開新振靡清弊矣乃復以邑志持商於余余歡然色喜以合江山偏水僻厯考並無成書而葉君乃能獨任其難創始圖新厯閱數遍未嘗不歎良工之心苦又未嘗不喜賢吏之才優邑之士庶能勿樂其志之新創而因之得所稽考也哉

舊序

清乾隆二十七年

羅文思

邑人

合江符陽古邑也山河流峙竹樹紛披風土醇良人民輻輳自秦漢以及

唐宋未嘗不稱甚盛焉迨經兵燹之後傾圮廢墜之態目幾不忍觀矣蒞茲土者其必有所以振靡救敝而爲一邑之保障也則幸甚丙子歲邑侯葉公奉命來合越數載約已惠民政修人理百廢俱舉外復蒐合邑故乘以昔年之行事爲今日之官箴詎知遠稽近考而所謂編年紀月者渺不可得因喟然歎曰邑之不可無志猶國之不可無史也國無史無以表一國之事蹟邑無志亦無以彰一邑之楷模此咎舍司牧其奚歸遂決計纂修並延貴業師朱墨園先生總理其務公饒史才墨園先生亦熟於記載獨愧余以一官匏繫西秦未得與我邑侯時親教益且爲我邑侯共襄盛舉也中間王事奔馳關河迢遞雖魚雁時通要亦徒藉雲樹纏繞我邑侯左右間耳今值志工告竣邑侯捐差抵秦屬序於余且將志稿寄讀恭覽數過但見綱目臚分經紀整秩體制倣諸大家論贊綽有深意人之有關地方者無微弗及事之有關世道者無隱弗彰搜奇摘遠以示公忠藏慝標熾以存厚道古稱班馬之才不是過也余因不揣固陋特僭數言以應

邑侯之命

舊序 清乾隆二十七年

知縣 葉體仁

余蒞斯土七年矣五夜兢兢愧無善狀可以上報朝庭下撫士庶雖城垣壇廟漸次培修要皆分所應耳又嘗念朱紫陽詢郡志於南康而論者咸以爲知務因是知志之不可不修合江舊無志且地居僻壤樸略成俗詢其文獻俱無可徵乃與邑之紳士共相採訪始成是帙夫前之不興是舉者殆以事蹟之茫無可據而憚其難耳不知縱無舊志可考而或於省志核其大概或於州志溯其源委又或於殘碑斷碣識其忠臣義士雖明知不無遺漏然較毫無所傳則有閒也昔劉知幾論史有三長袁崧論史有五難志固無殊於史作者亦正不易惟於輿圖沿革詳其文官職祀典昭其實忠孝廉節表其名亦可寓勸善懲惡之意焉是舉也閱數月而始竣其丹鉛論定皆吾師墨園夫子主之余不佞相與聿觀厥成而尤願邑之人藉爲觀摩作忠作孝以不負余今日創志之苦心則大幸矣

舊序

清嘉慶十七年

知縣 秦 湘

縣之有志猶國之有史也品崇孝弟俗尚敦龐凡庠序學校士習民風以及休禔災祥無不悉備亦無不悉舉合江雖彈丸小邑而上接瀘敘下達重夔固人物輻輳風俗充美之區也不特士人讀書舉業秩秩雍雍恪遵禮法卽僻壤鄉愚尙知廉恥余自丁卯冬來蒞茲土凡邑之政令無事更張亦無敢懈怠上以體聖天子牧民之至意下以慰士庶人屬望之深心因思合江縣志自乾隆壬午歲創修後迄今幾五十年鼠殘蠹蝕剝落不堪壬申春間奉文續輯卽與廣文楊致道鄭國楹共議圖修一時紳士周治鄭廷臣闕明久胡樸等各自解囊並首倡募捐共勦厥事依次增補付梓鐫刻至五月告成雖不能無遺漏亦未始非型方訓俗之一助云

舊序

清嘉慶十七年

教諭 楊致道

志者古史之流別淑慝昭懲勸人心風俗所關匪淺也合江向無志乘乾隆二十七年前任葉公體仁始創修之其時期在速成故考核未詳采訪

未徧遺漏實多然賴有是編不至古蹟消磨文獻無徵其功固未可沒也
余司鐸於茲已經六載居嘗與都人士以詩文相切磋復諄諄以砥行立
名爲諭期於不失其職間或談論風土人物得一可信可傳者卽筆而存
之而二三好古之士亦往往以素所聞見相質謂其不獲續入志中爲恨
蓋自壬午之後迄今又五十年其間循良之吏俊傑之生與夫忠孝節烈
爲一時所稱頌者多矣我明府秦蘭畹先生以江左名家惠蒞斯邑下車
之後興墜舉廢區畫咸周自捐廉改建書院文橋各祠宇而外復念縣志
久殘欲重修之會大憲議增省志並檄各府廳州縣重加補輯以備采取
乃屬余同鄧君漁溪刻期謀始兼以邑中紳士數人共相較論爬羅剔抉
頗著微勞片語單詞俱昭慎重是役也閱五月而告成逐類分載較昔加
詳焉亦猶是葉公之心也尤願後之人維持風化相與陸續脩明庶幾表
微闡幽垂爲矩範俾觸目者務本敦倫咸知取法未始非化民成俗之一
道也昔常道將志蜀人物自漢及晉四百人復撰後賢志益其未備呂大

防以樂道人善稱之區區之心是所望於後之官是邑與居是邑者

舊序 清嘉慶十七年

訓導 鄭國楹

合江在漢爲符縣東漢曰符節蕭齊曰安樂至後周始改爲合江蓋取雙江匯合而名之也邑乘自前令江夏葉公體仁采輯後續修無聞遂使數十年中可信而可傳者皆曠闕弗載良可歎也我蘭畹明府蒞任五載道齊化洽百廢俱興日者屬余同官二人告之曰邑之有志猶國之有史隨時補葺正不可廢兩君盍共圖之余惟此舉風教所關苟非確有依據而欲妄肆撫拾則信者未信疑者益疑於勸懲之義奚取焉乃退而搜集舊志並與學中諸同人參互考訂以求其實去取予奪無敢稍濫至逐卷次第悉照大憲發給式樣依類編成其有不關邑事如帝王故宮僭竊之類亦略叙數語用存其日期完備也晦朔五易未敢告勞矢慎矢勤乃成是集較諸從前所作或者其有當乎抑聞邑前輩王蜀元董樗齋兩先生俱有舊稿徧求之竟不可得是又不無遺憾云

舊序

清同治十年

羅增垣 邑人

邑乘以行遠也顧穢史謗書昔人不免下此則何能爲役然動諉於志具才識之不逮使數十年忠孝節義卓卓然可資激勸者煙銷雨散滅沒而不彰則大不可況邑志續修於嘉慶十七年迄今垂六十載矣壬戌秋髮賊過境兵燹後文獻無徵兼以原板散佚無存是又宜踵而修焉非必作述才之謂其謂因陋就簡傳其人不計其文之工拙以表暴於當世雖不敏其又奚辭夫志之敝也以愛憎爲取舍以恩怨爲褒貶以親疎異同爲抑揚而進退幸不然而域於耳目窘於諮詢獲者什一而遺之者倍蓰甚或鋪張鴻藻馳騁其議論以夸多而鬥靡雖規摹古作者之林於體製亦非宜今新增者什之二三經各大令纂輯成編餘皆因仍舊製庶可告無罪於當時見原於公論若夫言之無文行而不遠心誠惡焉請以俟後之君子